

Visoki predstavnik konsolidirao tužilaštva u oba bh. entiteta

Visoki predstavnik, Paddy Ashdown, donio je danas odluke kojima se usklađuju tužilački sistemi u Federaciji Bosne i Hercegovine, deset kantona Federacije i Republici Srpskoj. Odlukama Visokog predstavnika mijenjaju se i dopunjuju postojeći zakoni kojima se reguliraju tužilaštva u kantonima Federacije i oba entiteta, te konsolidiraju uredi tužilaštva na kantonalnim, odnosno okružnim nivoima. Visoki predstavnik je, također, zbog ovih promjena, donio i odgovarajuće izmjene i dopune entitetskih zakona o visokim sudskim i tužilačkim vijećima.

Odlukama Visokog predstavnika vrši se reforma sadašnjih tužilačkih sistema u FBiH i RS, tako da se ukidaju sva tužilaštva na općinskom nivou, a njihove funkcije se preraspoređuju u postojeća kantonalna (u Federaciji) i okružna tužilaštva (u Republici Srpskoj). Ove izmjene su ugrađene u dopunjene zakone o Tužilaštvu FBiH i Tužilaštvu RS, koja također sada imaju novu strukturu. Državno tužilaštvo nije obuhvaćeno ovim izmjenama.

Općinski tužioci su trenutno zadužena da rade na svim vrstama gonjenja, uključujući i sve kompleksnije slučajeve prevare i organiziranog kriminala. Širenjem kantonalnih i okružnih tužilaštava pruža se mogućnost tužiocima da se specijaliziraju u nekoj oblasti gonjenja. Odlukama Visokog predstavnika uspostavlja se efikasniji, profesionalniji i moderniji tužilački sistem u cijeloj BiH.

Ovim izmjenama ne smanjuje se broj tužilaca u BiH, već se njima rješavaju značajniji problemi sa kojima se suočavaju tužioci u BiH. U malim tužilaštvima tužioci su se često

nalazili u situaciji da su suviše blizu optuženim, a suviše daleko od profesionalne mreže za podršku koju nude kolege, što je otežavalo provođenje efikasnih istraga i donošenje odluka. Dosadašnja iscjepkana struktura dovela je do nejasnih razgraničenja jurisdikcije i nepotrebnih administrativnih troškova uzrokovanih održavanjem velikog broja manjih ureda.

Ove reforme su dio napora koje Visoki predstavnik ulaže u cilju osiguranja zakonitosti i vladavine prava u Bosni i Hercegovini, što je od ključnog značaja za otvaranje novih radnih mjesta i dalje privlačenje međunarodnih i domaćih ulaganja. Prijedlog plana za restrukturiranje sistema sudova u cijeloj BiH dostavljen je odgovarajućim entitetskim institucijama.

Izmjene i dopune zakona o kantonalnim tužilaštvima i Zakona o Tužilaštvu FBiH i Zakona o Tužilaštvu RS stupaju na snagu odmah, mada se njihova primjena odlaže dok novopostavljena visoka sudska i tužilačka vijeća ne imenjuju odgovarajuće osobe na ove dužnosti.